

忻州志卷六

知州賈容遠纂脩

詩

行忻代間

范仲淹

數年風土塞門行說看江山意暫清  
求取罷兵南北去滿樓蒼翠足生平

寒食遊福田寺

元德明

春山寂寂掩禪扉腹嶺盤盤入翠微  
布襪青鞋供勝踐粥魚齋鼓薦元機  
日烘幽徑綠煙暖風定曉枝紅雨稀  
曾是西堂讀書客不應啼鳥也催歸

忻州志

卷六

藝文詩

讀書山居六首

元好問

瘦竹藤斜掛藜花草亂生林高風有態  
苔滑水無聲石澗雲光動橋平水漸過  
野陰添晚重山意向秋多樹合秋聲滿  
村荒暮景間虹收仍白日雨雲忽秋山  
川迴楓林散山深竹港幽疏煙沉去鳥  
落日送歸牛漲落沙浪出堤摧岸口斜  
斷橋惟聚沫高樹閣浮槎鷺影兼秋盡  
蟬聲帶晚涼陂長畱積水川澗盡斜陽

畱月軒

元好問

丈室何所有琴一書數冊花竹結四鄰  
繁陰散芳澤閑門無車馬明月即佳客  
三人成邂逅又復得驩伯驩伯



屬我歌蟾兔爲動色商聲隱金石桂樹風索索乾坤月  
與我光滅卽生魄元精貫當中寧有天壤隔卯君尚奚  
待言論累數百多談令人厭坐睡驚墮憤一笑雞未鳴  
虛窓自生白

九日讀書山用陶詩露淒暄風息氣清天曠明爲韻

賦十詩

行帳適南下居人跼庭戶城中望青山一水不易渡今  
朝川涂靜偶得展衰步蕩如脫囚拘廣莫開四顧半生  
無根著筋力疲世故大似丁令威歸來歎墟墓鄉閭喪  
亂久觸目異平素粉榆雖尚存歲晏多霜露

忻州志

卷六 藝文詩

二

今日後何日霜氣條已淒登高有佳招山中古招提翩  
翩劉公子王田重相携乾坤動詩興澗壑忘攀躋霍侯  
家甚貧劣有酒與雞城居厭鞮鼓移家此幽棲世網不  
易逃所向皆塵泥何以濯我纓林間有清溪

山腰抱佛刹十里望家園亦有野人居層崖映柴門昔  
我東巖君曾此避塵喧林泉畱杖履歲月歸琴樽翁今  
爲飛仙過眼幾寒暄蒼蒼池上柳青衫見諸孫踈燈照  
茅屋新月入頽垣依依覽陳迹惻愴不能言

霜氣一匳薄杳杳秋山空臨高望煙樹黃落雜青紅造  
物故豪縱窮秋變春容錦障三百里不盡臺山東粲粲



黃金華羅生蒿艾叢野人不知貴幽香散秋風秋物白  
橫陳顧揖苦不供誰能搖醉筆吐句凌清雄

宇宙有此山閱世鴻鳥疾何人不此遊名姓寧復識茲  
辰世所重前代之盛集柴桑有故事二謝留俊筆併數  
孟與桓此外誰記憶人生百年內踏地皆種迹獨惟我  
輩人興懷念今昔山林與臯壤自古長太息

賞心古難并暮景日易費故人成此遊尊酒重相慰新  
詩亘醞唱清談見滋味鱸鮓方偃蹇鼃黽共騰沸懸險  
劇褒斜清渾雜涇渭爭教十圍腹滿貯憂與畏情親到  
真率寧復轉喉諱鄭重伯雅生藉汝聊吐氣

忻州志

卷六

藝文詩

三

往年在南都閑閑主文衡九日登吹臺追隨盡名卿酒  
酣公賦詩揮灑筆不停蛟龍起庭戶破壁春雷轟堂堂  
髯御史痛飲益精明亦有李與王玉樹含秋清我特最  
後來四座頗爲傾今朝念存沒壯小徒自驚

我在正大初作吏浙江

浙水在鄆陽見水經注

邊山城官事少日

放浙江船菊潭秋花滿紫稻釀寒泉甘腴入小苦幽光  
出清妍歸路踏月明醉袖風翩翩父老遮我留謂我欲  
登仙一別半山亭回頭餘十年江山不可越目斷西南  
天

吾山一何高清涼屹相望龍頭出白堦佛屋壓青嶂雲



光見秋毫旭日發豪相峩峩寶樓閣金界儼龍象鄉曲  
二十年香火闕瞻向金花香錦草夢想雲雨上福田行  
欲近重爲詩酒障終當陟層巔放眼天宇曠

紫微老仙伯少日見承平甲子五百餘雙瞳益清明披  
莊不盈尺翛然澹無營庭柯挂秋蔬老樹風泠泠我有  
年德尊公深鄉曲情思得菊漈酒爲公制頽齡作詩語  
同游明年復尋盟看翁九節杖翩翩上崢嶸

讀書山雪中

元好問

前年望歸歸不得去年中途脚無力殘生何意有今年  
突兀家山墮眼前東家西家百壺酒主人捧觸客長壽

忻州志

卷六

藝文詩

四

先生醉袖挽眷迴萬落千村滿花柳山靈爲渠也放顛  
世界幻入堯羅綿似嫌衣錦大寒乞別作玉屑粧山川  
人言少微照鄉井准備黃雲三萬頃何人辦作陳瑩中  
來與先生共炊餅

赤石谷

元好問

林罅因崖霧杳冥石根寒溜玉玎玲雲來翔漢疑秋早  
山近清涼覺地靈靜愛鳥聲存野調閑嫌人跡帶塵腥  
南臺說有金銀氣可是并汾處士星

二月十五日鶴

元好問

九龍岡上元元祠人言尊像神所遺年年二月降靈鶴



來無定數有定期城頭曉露生新警萬首望穿雲際影  
不知濁世誰下臨只許霜毫見脩整石壇花落松風冷  
憂然長鳴人語定百年驚老誇見聞萬里黃冠赴靈應  
只從遊騎突重圍城郭並與人民非可憐侈殿荒虛裡  
無復當年丁令威

鹿泉新居二十四韻

元好問

土門西邊井陘渡野日荒荒下汀樹榆關石嶺都幾程  
客夢徃徃迷歸路塵埃風雨半生過儘著筋骸久世故  
寧州假館又兩年未保東來不西去山城百家家有山  
觀面呈山誰一顧賣書買得呂氏園不謂全山舉相付

忻州志

卷六

藝文詩

五

北崖老作土灰色擁腫形模一夸父娟娟正有小峨眉  
却立不容親杖屨就中抱犢尤峭拔望見韓山卽攀附  
韓山砦頭西望濶全趙米如纜數聚眼中麾蓋天上來  
泝水鼓旗紛偃仆漢家威靈萬萬古石子連岡猶虎距  
夏秋衆壑會鹿泉浩浩湍聲瀉餘怒西南諸峯不知數  
蕩海鯤鱸尻背露霏煙空翠有無中百態陰晴變朝暮  
靈巖龍泉曾一到獨欠封龍展衰步學仙不愛徐童花  
李相書龕心所慕平生懷抱向山盡老氣崔嵬如有助  
巖居楛寂朝市喧喧寂兩間差有趣得行固願留不惡  
流坎且當隨所遇何曾萬錢何用許方丈有山容下筋



管城初無食肉相黃帽非供折腰具明年高築野史亭  
天已安排看山處多慚不及謝宣城標出敬亭天一柱

感興 夜宿讀書山作

元好問

倚梯從昔望煙霄七葉何人竟珥貂道路長教車歷塵  
功名唯有鬢飄蕭勤如韓子初無補晚似馮公豈見招  
五十三年等閑裏一窻風葉雨瀟瀟

十一月五日暫往西張

元好問

城隈細路入沙汀絮帽衝風日再經歲歎邨虛更荒惡  
窮冬人影赤伶俜林煙漠漠鴉邊暗山骨稜稜雪外青  
四十年來此寒苦凍吟猶記隴關亭

忻州志

卷六 藝文詩

六

石嶺關書所見

元好問

軋軋旃車轉石槽故關猶復戍方刀連營突騎紅塵暗  
微服行人細路高已化蟲沙休自歎厭逢豺虎欲安逃  
青雲玉立三千丈元只東山意象豪

論詩三十首

元好問

漢謠魏什久紛紜正體無人與細論誰是詩中疏鑿手  
暫教涇渭各清渾

曹劉坐嘯虎生風四海無人角雨雉可惜并州劉越石  
不教橫槊建安中

鄴下風流在晉多壯懷猶見缺壺歌風雲張恨張華少



温李新聲奈爾何

一語天然萬古新  
豪花落盡見真淳  
南窗白日羲皇上  
未害淵明是晉人

縱橫詩筆見高情  
何物能澆魏磊平  
老阮不狂誰會得  
出門一笑大江橫

心畫心聲總失真  
文章豈復見爲人  
高情千古閒居賦  
爭信安仁拜路塵

慷慨歌謠絕不傳  
穹廬一曲本天然  
中州萬古英雄氣  
也到陰山敕勒川

沈宋橫馳翰墨場  
風流初不廢齊梁  
論功若準平吳例  
忻州志

卷六

藝文詩

七

合著黃金鑄子昂

鬪靡誇多費  
覽觀陸文猶恨冗  
於潘心聲只要傳  
心了  
布穀瀾翻可是誰

排比鋪張特一途  
藩籬如此亦區區  
少陵自有連城壁  
爭奈微之識砒砒

眼處心生句自神  
暗中摸索總非真  
畫圖臨出秦川景  
親到長安有幾人

望帝春心託杜鵑  
佳人錦瑟怨華年  
詩家總愛西崑好  
獨恨無人作鄭箋

萬古文章有坦途  
縱橫誰是玉川盧  
真書不入今人眼



而輩從教鬼畫符

出處殊途聽所安山林何得賤衣冠華歆一擲金隨重  
大是渠儂被眼謾

筆底銀河落九天何曾顛顛飯山前世間東抹西抹手  
枉著書生待魯連

切切秋蟲萬古情燈前山鬼淚縱橫鑑湖春好無人賦  
夾岸桃花錦浪生

切響浮聲發巧深研磨雖苦果何心浪翁水樂無宮徵  
自是雲山韶濩音

東野窮愁死不休高天厚地一詩囚江山萬古潮陽筆  
合在元龍百尺樓

萬古幽人在澗阿百年孤憤竟如何無人說與天隨子  
春草輸贏校幾多

謝客風容映古今發源誰似柳州深朱絃一拂遺音在  
却是當年寂莫心

窘步相仍死不前唱酬無復見前賢縱橫正有凌雲筆  
俯仰隨入亦可憐

竒外無竒更出竒一波纔動萬波隨只知詩到蘓黃盡  
滄海橫流却是誰

曲學虛荒小說欺俳諧怒罵豈宜時今人合笑古人拙



除却雅言都不知

有情芍藥含春淚無力薔薇臥晚枝拈出退之山石句  
始知渠是女郎詩

亂後玄都失故基看花詩在只堪悲劉郎也是人間客  
枉向春風怨兔葵

金入洪鑪不厭頻精真那計受纖塵蕪門果有忠臣在  
肯放陂詩百態新

百年纔覺古風迴元祐諸人次第來諱學金陵猶有說  
竟將何罪廢歐梅

古雅難將子美親精純全失義山真論詩寧下涪翁拜

忻州志

卷六 藝文詩

九

未作江西社裏人

池塘春草謝家春萬古千秋五字新傳語閉門陳正字  
可憐無補費精神

撼樹蚍蜉自覺狂書生技癢愛論量老來畱得詩千首  
却被何人較短長

初挈家還讀書山雜詩二首

元好問

天門筆勢到閒閒相國文章玉筍班從此晉陽方志上  
繫舟山是讀書山

眼中華屋記生存舊事無人可共論老樹婆娑三百尺  
青衫還見讀書孫



馬嶺

元好問

仙人臺高鶴飛度錦繡堂傾去無路人言馬嶺差可行  
此似黃榆猶坦步石門木落風颼颼僕夫衣單望南州  
皐落東南三百里鬢毛衰颯兩年秋

家山歸夢圖

元好問

別却并州已六年眼中歸路直於弦春晴門巷桑榆綠  
猶記騎驢掠社錢

遊騎北來塵滿城月明空照漢家營巷中正有家山在  
一片鄉心畫不成

後灣別業

即今元家山土人呼為後老灣

元好問

忻州志

卷六 藝文詩

十

薄雲晴日爛烘春高柳清風便可人一飽本無華屋念  
百年今見老農身童童翠蓋桑初合濫濫蒼波麥已勻  
便與溪塘作盟約不應重遣濯纓塵

懷益之兄

元好問

牢落關河雁一聲干戈滿眼苦為情三年浪走空皮骨  
四海相望只弟兄黃耳定從秋後到白頭新自夜來生  
西樓日日西州道欲賦窮愁竟不成

自題寫真二首

元好問

山林日月老潛夫骨入窮泉未擬枯幽澗有冰含太古  
無人和玉試洪鑪 孫綽雖沒泉壤尸且不朽



一派春煙澹不收漁家已許借扁舟山林且漫蹉跎去  
莫問人間第幾流

寫真自贊

元好問

短小精悍大有孟浪勃萃槃跚稍自振厲豪爽不足以  
爲德秀之兄蕭散不足以爲元卿之弟至於欽叔之雅  
量希顏之高氣京甫之蘊藉仲澤之明鏡人豈不自知  
蓋天稟有限不可以強而至若夫立心於毀譽失真之  
後而無所卹橫身於利害相磨之場而莫之避以此而  
擬諸君亦庶幾有措足之地

繫舟山圖

元裕之先大夫嘗  
居此山之東巖

趙秉文

忻州志

卷六

藝文詩

十一

山頭佛屋五三間山勢相連石嶺關名字不經從我改  
便稱元子讀書山

裕之繫舟山圖

楊雲翼

名利走朝市山居良獨難况復山中入讀書不求官東  
巖有佳致書室方丈寬彼美元夫子學道如觀瀾孔子孟  
澤有餘曾顏膏未殘向來種德深直與山根蟠之子起  
其門孤鳳騫羽翰計偕聊復爾平步青雲端竭來遊京  
師士子拭目觀禮部天下士文盟今歐韓一見折行輩  
始知平生歡舞雩咏春風期著曾點冠五言造平淡許  
上蘓州壇我嘗讀子詩一唱而三歎世人非無才多爲



才所謾高者足詆訶下者或辛酸吾子忠厚姿不受薄俗漫晴雲意自高淵水深無湍他日傳吾道政要才行完會使茲山名與子俱不刊

讀裕之弟詩藁

元好古

阿翁醉語戲兒痴說著蟬詩也道奇吳下阿蒙非向日新篇爭遣九泉知

鶯藏深樹只聞聲不著詩家畫不成慙愧阿兄無好語五言城下把降旌

傳家詩學在諸郎刻腹留書死敢忘背上錦囊三箭在直須千古說穿楊

忻州志

卷六

藝文詩

十三

凌雲臺

在東門外磨臺上

金李中立

山圍平野四廻環天迥臺高眼界寬雲漏殘陽明遠岫濤翻急雨漲前灘一川勝趣四時好千里雄風三伏寒誰見凌雲清絕處夜涼空翠濕闌干

關城鎮書懷

明魏允貞 巡撫

行年五十已知非况復親年倍古稀爲問腰間懸紫綬何如膝下舞斑衣

忻州道中

楊 綵 巡撫

蕭蕭馬匹向東征一望川原驛路平回首雁門雲黯淡月明猶令旅魂驚



前題

林魁 提學

秋風迢遞晉陽田  
遙望關山一矚前  
西域未通元有地  
北門深鎖足扶天  
江梅夜落無霜角  
寒草春稀帶暮煙  
莫道鉄衣寒到骨  
千金須記買龍泉

前題

梁隆吉 汾州同知

匹馬冲霄此地過  
沙明汨汨漾晴波  
此來忻口經三晉  
東折滹沱落九河  
秋老寒潭流自細  
源深活水派還多  
愁看雙鬢刁騷甚  
欲製漁翁溪上蓑

忻署雨後遣懷

楊益美 巡按

鏡中日覺鬢毛蒼  
到處逢迎總異方  
塞役甫竣辭代嶠

忻州志

卷六 藝文詩

三

郡齋初卽憇  
忻囊蛛絲斜掛簷  
風靜蛙鼓爭喧  
沼雨涼小扇輕稀  
聊獨坐晚來疇  
可洗離腸

閱忻工南樓紀興

魏允貞

日暮輕裘更朔風  
登樓慷慨與誰同  
千峯堆雪胡塵淨  
百雉連雲漢成雄  
兵法古來兼地利  
人謀今亦借神工  
丁寧刺史無他策  
保障惟期善後功

和前韻

侯正鵠 推官

層樓城上倚天風  
萬里空濛一望同  
睥睨西連秦塞險  
雲山北拱帝圖雄  
九原烽火形偏壯  
三晉關河勢轉工  
牧馬水清胡騎絕  
和戎誰復更論功



渡河

趙廷松 會事

山下流泉侵馬腹山中石徑繞羊腸空行千里復萬里  
在處他鄉是故鄉

東巖寺二首

黨承志

山徑崎嶇入福田峰回路轉興悠然蒼崑雲霽梵宮出  
翠巖泉通瀑布懸名勝果然超十地清涼端合近諸天  
尚平了却人間累欲向禪關結淨緣

寺傍東巖一徑斜峯巒朝暮足雲霞參天老檜籠晴日  
出石靈泉走白沙良夜古龕仍有月

遺山有東龕玩月詩深春楸

樹正多花臺上會續清涼傳莫道并州處士誇

忻州志

卷六 藝文詩

十四

獨擔山

朱良 知州

突兀山峯勢聳孤獨擔名揭自浮屠擔山無補人間事  
擔起乾坤是丈夫

一峯削翠倚雲孤壯士蛟龍手試屠乘輿直登山絕頂  
英雄頓覺愧愚夫

忠良自古起危孤猛士何曾恥販屠今日登高頻拭目  
細將心事問樵夫

泮宮舊址眺望

喬宇 吏部尚書

高城雉堞遠巖嵒廟學從誰徒舊宮一代山川在人物  
十年割據幾英雄殘碑尚有唐文字遺俗猶存晉古風



日暮九龍原上望萬家鱗次水烟中

次韻

朱良

周遭山勢擁崒嵒山上惟餘白鶴宮學鎮九原稱秀麗  
地靈千古產豪雄寺鐘隱出疎林抄牧笛橫吹落日風  
惆悵不堪回首處斷碑荒草暮烟中

忻中白鶴觀初自唐開元間每歲二月望羣鶴戾止  
因以得名事見元遺山記遺山自謂幼及兩見兵  
荒後不至矣寥寥至今且踰三百年昨歲丁酉州  
城告完高堅異常仲春月滿之期羣鶴復集觀上  
羽族飛類得氣之先或不誣矣稍稍脩葺其觀存  
故跡耳因為絕句二首

忻州志

卷六

藝文詩

十五

魏允貞

白鶴觀頭白鶴羣土人不見只曾聞誰知三百年來後  
又覩聯翩下碧雲

百年築地議紛紛經始功成早報聞不信胎禽齊侯月  
為看雉堞已連雲

前韻

劉汝康 副使

元晴素羽鳳凰羣聲戾九臯天上聞祇為聖人今在位  
蹠躔來止護鄉雲

前韻

崔士榮 汾州知府



九原屹立萬山羣仙宇鍾聲度嶺聞遙想當年金碧相  
有爲一切等浮雲

瀕洞風塵日日紛仙音寥絕久無聞伯陽契道今開府  
鶴隊翩翩下紫雲

白雲丰姿迥出羣一聲清唳半天聞令威今返人非舊  
惟有青山與白雲

滄海桑田世變紛元宮興廢不堪聞而今正值龍沙會  
應有仙人駕鶴雲

淤泥寺

來天球僉事

野寺消煩暑長途促晚行落霞明遠岫返照下孤城月

忻州志

卷六

藝文詩

六

傍前村出風從古渡生僕夫毋乃倦於此亦關情

匡村寺

雷大壯知州

舊國存遺寺幽情興轉賒山僧無個事汲水灌桃花

前題

武文郡人

定和禪院倚荒邱此日登臨夙願酬遠近山光來法界  
參差樹色隱經樓黃鸝睍睍添詩興紅葉偏翻悅醉眸  
斜日相催情不盡擬從佳節約重遊

悞入梵王家悠然興轉加老僧供茗椀童子獻松花鳥  
墮林稍露風移塔頂霞談空因坐久回首夕陽斜

書文殊寺

趙夢麟



古道藏幽利曇花分外澄白雲芳樹遶碧草野烟凝塵  
斷閑中客鍾廻定禪僧何時消障礙到此聽傳燈  
三月今將半邊城春未闌雨微楊葉飽風勁杏花寒水  
碧含沙見山青帶雪看吾徒隨地樂莫放酒杯寬  
駐馬眺高原桃花處處繁情光浮遠樹翠色遶孤村座  
右啼黃鳥歌前倒綠尊何須悲落魄笑傲小乾坤

懋鯨音閣

王治

小軒高豁雨初晴臥見南山及枕平蝴蝶夢魂看幻境  
蠅蝸名利笑浮生雲飄闔苑仙人袂雨晏淇園君子聲  
城市已饒林壑趣何須騎鶴訪蓬瀛

忻州志

卷六

藝文詩

十七

宣子廟

詠趙世家

黨承志

叔帶持腰悲夜歡百年幽夢兆危安趙穿不作桃園逆  
宣孟應難越境還舊著恩威烈似日終慙名義炳如丹  
麟經不削史狐筆欲爲忠良諱亦難

公孫厚士祠

祝灝

藏山陳迹已千秋每讀遺編卽淚流排難巧爲存趙計  
舍生終遂立孤謀英豪不逞荆樊勇忠義堪爲莽操羞  
今日觀風因拜奠九原如起願同遊

程嬰厚士祠

祝灝

血刃縱橫徧下宮主家噍類一朝空臨危獨任存孤責



後死徐圖敵愾功慷慨訣言明素志寂寥遺像凜英風  
玳簪玉劍當時客殉義忘身孰與同

野史遺亭

祝灝

東風小隊出部垆訪古因過野史亭衰草又隨春日綠  
好山偏向夕陽青百年國事存笥藁一代才華著典刑  
妙絕中州新樂府興來高唱有誰聽

公孫厚士墓

張鳳狷

士見危致命乘風來此行酌君一杯酒千古欲同塋  
程嬰厚士墓

張鳳狷

可託六尺孤乘風來此顧酌君一杯酒千古欲同墓

忻州志

卷六

藝文詩

十六

賀兒溝

張鳳狷

賀兒溝草芊芊賀兒人去已千載溝名直與天地相周  
旋我昔備聞嬰杵賢不圖今日遊其阡高風千古不可  
邁感之令人涕欲漣嗚呼下宮之難不偶然卒之死孤  
立孤名俱全君不見世俗下趨如流川賣友背主徒翩  
翩其視二子之爲何天淵

陳豨獄

朱良

相傳此地陳豨獄真謬無憑未可知無怪淮陰萌反狀  
禍端原不自陳豨

元遺山墓

朱良



遺山太白後詩仙逸興飄然見百篇荒塚雲烟常夜夜  
落花風雨自年年九岡原上觀遺跡十里山前拜大賢  
賴有太常佳句在郡人願寫付碑鐫

蛇山二首

王治

青蛇頭上弄光明劍倚西風酒數行釣艇綸竿都未備  
江山引手結鷗盟

遙天雪霽萬山蒼東風吹動酒瓢香亟欲托廬滹水上  
水源不盡意深長

南張山水

王治

太行水來一線清悠悠牧馬玉環明雲烽煙墅誰點綴

忻州志

卷六

藝文詩

九

高占南張圍畫屏

直道溝二首

王治

踈茅潔石漱寒清玉佩珊珊日夜聲沿溪過午聞鷄犬  
幾屋人家烟縷輕

莫怪人云直道難此溝名直亦彎環由他變得如弓樣  
不改溪聲太古寒

九龍連阜

黨承志

九龍連絡擁重岡地設天開奠此鄉壁跨原頭城半迥  
週迴岡勢水迂長千年郡國山河壯三晉邱陵草木荒  
形勝永標方志上不同井邑變滄桑



前題

王治

遠阜來龍九蜿蜒勢各雄風雷驅不去雲雨澤常通靈  
秀鍾今昔賢豪迥異同乾坤登眺感逝水日趨東

前題

楊維嶽

連山天矯走龍虬遠勢平吞十二樓趙晉流風銷百戰  
程孫俠骨自千秋霜寒榆柳人烟暝春漲滹沱宇宙浮  
翹首清涼看不盡待駿白鶴過山頭

山盡處有白鶴觀

前題

常自脩

蜿蜒連山勢若虬金城十二駕仙樓疆聯冀域風猶昔  
地接儋林氣欲秋九阜雄蟠青礪永七祠高表綠煙浮

忻州志

卷六

藝文詩

三

徘徊今古茫然事一片飛雲過嶺頭

天罡蜿蜒走長虬屈屈盤盤倚戍樓趙氏有靈存萬古  
公孫抱義壯千秋曉霞映處嵐光閃暮雨霏時虹影浮  
乘輿掀髯登絕巘恍疑身在五雲頭

前題

張銑

龍阜飛連百雉邱峯巒蜿蜒轉蹙何洲晤言形勢連三島  
忽憶崑崙過九州白馬環應雄冀脉金牛回擬走秦陬  
清時不減東山興共載碁罇翫彩虬

前題

宿尚謙

九龍吞土山川水雄鎮忻城勢莫擬變化風雷飛上天



甘霖溥施萬千里

牧水環城

黨承志

牧水原來白馬山東流一帶郡城環春深暖渚宜脩禊  
秋早芳洲憶采蘭瀾漲幾回觀漾渺渡喧徹夜聽潺湲  
欲通三會蒙山下看取扁舟落釣灣

遺山溥沱渠堰託稱水利云云

前題

王治

九龍岡上望晴川水色悠悠接遠天絕似江南風景好  
烟波只欠釣魚船

水繞青山郭源來白馬洪年光與俱逝舟楫竟誰通兩  
過波逾漲春深冰未融幾村資灌溉亦有濟時功

忻州志

卷六

藝文詩

三

野史亭

黨承志

元子文章足壯觀不教簪筆在金鑾憂來劉向歸休早  
老去馮唐際會難埜史亭荒無瓦礫中州集在重琅玕  
先生有句猶能道盛世何曾有稗官

前題

王治

遺山不可作古塚尚依然騷雅雄當代風流仰後賢頽  
垣低宿草斷礎沒寒烟寂寞墳前月盈虛自歲年

前題

楊維嶽

迥野天低孤草亭何人著述薄西京墨池飛霧分澄紺  
椽筆凌霜付殺青一代遺文龍護酉千年華表鶴歸丁



書臺指點成榛莽，卧碣依稀認郝經。先生墓近亭郝經誌

前題

張銑

虛亭日圯沒寒烟，元子聲名宇宙懸。一代文章推獨步，千秋事業付新編。家山屹立挹風節，斷礎荒涼自歲年。回首九原不可作，麟經重覽意悽然。

前題

宿尚謙

世遠人亡亭不存，獨留遺趾見荒村。寸毫難舉心憂畏，

先生野史亭詩云云堪與千年史館論

東巖夜月

黨承志

冰輪輾碧夜光寒，最愛東巖寺裏看。輝映樓臺金界淨，

忻州志

卷六

藝文詩

三

影澄林壑玉壺寬，松楸香似飄丹桂。泉石聲疑咽素鸞，憶昔讀書人不見。月明還照繫舟山。

前題

王治

先人遊息地臨眺，欲消魂倚澗松猶在。書牆墨尚存林，卸自俯仰嵐靄變。朝昏回首霜天晚，寒燈出遠村。

前題

楊維嶽

何來飛鏡掛山椒，天界空明眼界饒。涼浸屏山圍翡翠，光分圓蓋落瓊瑤。空王殿是清虛府，梵唄音和緱氏簫。長嘯千巖天籟發，書聲彷彿在參寥。

前題

張銑



東巖高展碧林巒萬岫崢嶸拱梵壇泉石不隨人意暖  
月明偏上夜窻寒暗香擬逐嬋娟動澄影深宜鷺嶺看  
縹緲一輪天地濶繫舟真箇讀書山

前題

宿尚謙

山寺蕭蕭良夜月幽人豪興欲飛越吟成好句思悠然  
把酒何須相問謁

繫舟隱誦

黨承志

四載衆時此繫舟茫茫禹跡杳難求讀書山自先家改  
雲谷名因薛子留翠壑丹崖猶夙昔松風蘿月自春秋  
前脩遐軌誰能繼仰止空慙是俗流

忻州志

卷六 藝文詩

三

前題

王治

大禹維舟處相傳自昔云喬松蔭古刹絕巘臥間雲月  
色渾如舊書聲絕不聞薛元俱已矣誰與共論文

前題

楊維嶽

小鷺平窺大鷺峯崔嵬峭削紫芙蓉洪流天半懸飛鷁  
大壑雲深穩臥龍忽浸藤床蘿薜月時翻竹簡檜松風  
乾坤俛仰俱塵土不老青山自秀容

前題

張銑

洪流澤洞啟堯天神禹隨刊勩爛然濬導舟懸千仞岫  
安居人闢百花巔魚龍窟裡疑幽誦星月壇前見大賢



獨上高臺觀淑景流風猶足著華編

前題

宿尚謙

朗朗書聲徹繫舟只因元老此藏脩能將萬卷為經濟  
遠接平成神禹休

石嶺晴嵐

黨承志

石嶺巍然列郡南繫舟白馬遠相參峯頭露冷秋偏早  
谷口風和景易酣關塞險間通鳥道雲雷作處有龍潭  
晴嵐萬疊真堪畫水色天光共蔚藍

前題

王治

幃列南山翠層層石嶺橫塞鴻衝月度征旅逐霜行歲

忻州志

卷六

藝文詩

二十六

久危途易時平古戍輕遺山重故國到此眼偏明

前題

楊維嶽

巖險真成百二雄浮天蒼翠幻如龍西來不散函關氣  
東去遙開閬苑風定佛龕前金步障飛仙掌上玉芙蓉  
上方更有楊枝露記乞為霖施太空

余兩禱白雲洞皆雨

前題

張銑

關城陡接中條碧磴層層細路遙隱隱人旋山踏霧  
嚶嚶鳥掠石遷喬千家燈火烽烟靖萬疊峯巒宇宙寥  
攬轡南征恣游眺晴嵐一帶正堪描

前題

宿尚謙



涯南北遠相通石嶺關頭瑞靄濃多少征人時絡繹  
恍疑身在畫圖中

獨擔高登

楊光澤

竹杖分開草芒鞋印破沙一聲兩聲鳥千片萬片花

前題

黨承志

孤峯崛起勢嵯峨古寺巖崖翳薜蘿鳥逕有苔塵跡少  
緇壇無樹月明多仙畱勝蹟人傳說谷隱雲英鬼護呵  
洞口桃花春日麗來遊對景欲長歌

崛起龍原積石成獨擔千古擅雄名登臨絕頂雲霄近  
坐嘯半巖風日清牧馬河邊春草綠繫舟山下夕陽明

忻州志

卷六

藝文詩

三五

玉芝有穴無人識拂拭殘碑辯誌銘

前題

王治

雲母久無種玉芝何處尋祗餘山畔鳥春暖啼幽林棋  
局迷蒼蘚樵吟度遠岑爛柯難再遇惆悵歲年深

前題

楊維嶽

九折岩峩拱鷲峯岡原歷亂插芙蓉獨擔忽若騰蛟舞  
雙峙相看虎雄雲鎖芝房長護紫霜酣木葉競流紅  
振衣絕呼白興劇冷然欲御風

失題

楊維嶽

鷲峯色界總真如貝葉青蓮故未輪忍草布金彌大地



杳泉瀉玉散空厨三花未隔人天供一鐸長分法雨濡  
不是文殊饒普化那來魔地有尼珠

前題

邢志忠

松根石竇出泉香草樹高秋葉醉霜巖半遊亭更竒絕  
登臨頓覺興偏長

前題

彭琳

時序值高秋乘閑勝地遊蕭蕭紅葉戰泪汨碧泉流僧  
話消塵慮村醪破俗愁徘徊歸興懶風景似相留

前題

張銑

輿圖共羨醴泉甘此際飛流亦可參地列淵噴珠走岫

忻州志

卷六

藝文詩

三

天香風染葉浮丹桃源十里輪紅錦石髓千年送玉函  
三徑秋看黃菊滿崔嵬絢爛景堪耽

前題

宿尚謙

一年秋葉一翻紅脉脉流泉香冽同莫訝茲山效靈異  
太和元氣滿寰中

傘蓋青松

寺右廢塔二相傳  
殿瓦自來不塵

黨承志

寺傍山阿殿閣重童童如蓋蔭青松橋登彼岸歌金澗  
泉湧靈巖漱石淙林動微颺清籟遠龍歸幽洞翠烟濃  
依稀一段匡廬景只歎香爐瀑布峯

前題

王治



隱隱山間寺青青澗畔松團團擁大蓋鬱鬱當巖冬雲  
頂深棲鶴寒枝怪伏龍巖風朝暮激雄籟拚霜鍾

前題

崇承賜

崇岡陟盡到禪林松影森森坐午陰日轉山頭團倚蓋  
風生谷口靜聞琴石梁偃蹇橫蒼澗金刹輝煌嵌碧岑  
泉石襟期渾未厭聊題歲月記登臨

前題

楊維嶽

精藍高倚白雲天斷碣消磨不記年澗道嵐光浮疊石  
樹頭寒色咽飛泉千林忽發真空籟雙塔能參無住禪  
却解玻璃清淨理欲逃苦海寄脩椽

忻州志

卷六

藝文詩

七

前題

楊勉道

獨驅羸馬上禰林春雪飄飄隔夜陰  
厭居鄰市井  
幽閑真可樂書琴未消殘凍猶盈壑半捲浮雲尚倚岑

每將佳境樂登臨

前題

張銑

翠巖梵寺倚危坪萬壑紆廻一徑平夾澗長虹懸日曉  
倚空團蓋  
風清山圍金碧飛靈鷲泉吐淵泓走玉鯨  
高步崇巖恣遊眺不姑林籟叫鳴庚

前題

宿尚謙

萬樹森森翠色偏喜看白鶴舞蹁躚山空清晝人無事



細釋先天與後天

陀羅避暑

黨承志

陀峯鼇背鬱蒼蒼積翠浮嵐畫渺茫  
首夏陰崗猶帶雪初秋高木已經霜  
梵空花雨彌金界鷲嶺靈風灑石房  
勝地清涼炎暑隔濯纓何必羨滄浪

前題

王治

夜宿靈峯頂僧房雲霧深鐘聲聞梵韻  
泉石見禪心野燒明遙岫山陰擬遠岑  
連牀清不寐終夕語幽襟紅塵正炎暑  
上方清似秋幽人謝羈絆勝地恣淹留  
露頂納輕籟憑高快遠眸何當公此樂  
四海同清遊

忻州志

卷六

藝文詩

三

前題

張銑

陀峯突起逼高穹斷谷千尋遶上宮  
石磴巍峩增地秀松楸深蔭振天風  
登臨人倚羅浮表說法僧留磐石踪  
溽暑不煩堪駐蹕汾陽於此續詩龔

前題

宿尚謙

芙蓉插漢聳青蒼幾個禪僧住上方  
不是山頭無暑氣原來靜極自清涼

鍾乳雙山

黨承志

兩峯相望勢如京鍾乳依稀乃得名  
新畫佛頭螺黛淺曉開鸞鏡翠鬟明  
烟嵐縹緲巖間出苔蘚斑斕石上生



最喜山椒宜眺望數乘芒屨上崢嶸

前題

王治

鍾乳知何處雙山草木荒樓臺惜圯廢巖岫空青蒼莫  
覓三千兩寧辭十二行雲中川上月曾見幾存亡

前題

楊維嶺

青天忽落青珠璣寒光相照搖烟霏雙星未罷靈鵲馭  
二圓長服蒼龍駢亂嵐浮石衲衣濕空翠逐波環珮稀  
深雲萬壑埋玉乳落日千峯看翠微

前題

張銑

四合青園一望平雙山並峙水盈盈天開華表棲靈鶴

忻州志

卷六

藝文詩

三九

地吐精神孕玉英草色蒙茸嵐霧碧波光蕩漾珮環明  
應知沃野多憑怙思把詩書廸後氓

前題

宿尚謙

雙峯翠嶺峙乾方時有風吹萬卉香漫說登臨為勝景  
鍾靈棠棣世聯芳

金山綠洞

一云六洞一在李家長山二在部  
落三在張家山南北相傳產礦

黨承志

金山亦復號程侯山脉雲中接上游程為藏孤名不朽  
金綠采鑛洞還留雲從恒嶽連天去水遠滹沱入海流  
遙望一螺烟霧裡不勝清思費吟謳



前題

王治

東風送暖雪留寒雪後千峯正好看濃淡浮煙付近遠  
吟遊信宿不知還

混沌誰通竅金峯勝畫圖年深迷採處義重惜藏孤世  
態幾更變烟嵐時有無程侯垂永譽獨與此山俱

前題

楊維嶽

脩蛾隱約亦璘珣俯看并原渺一塵浮碧將無凌朔氣  
憑虛疑是化金人故侯骸體千秋在古洞神竒異代論  
莫以金銀誇氣象桃花久暗武陵津

前題

張銑

忻州志

卷六

藝文詩

三

綠洞泉深幾蠖洪瀾聲曲澗接天風懸橋孤竦留仙跡  
石徑幽冥見蘚蒙岑帶蔚嵐侵碧漢水浮瓊玖遠烟楓  
程侯事亦迷今古共說金山隱異猷

前題

宿尚謙

金山綠洞何深窅採鑛尋砂不可曉疑是程侯藏趙孤  
預將此穴虛揚表

弔寧武三忠王監司

亂懋

周總戎

遇吉

吳司馬

鉉

杜一鳳

秦國千年虎狼起北犯神京縱蛇豕寧關道鎮管糧廳  
廛守孤城而已矣生與明主衛封疆歿與明主全冠履



冠履獨全一線時同爲厲鬼騎箕尾慷慨舍身易從容  
赴義難當其籌戰守鐵膽鬼神酸天地昏我赤日月暗  
我丹解楊乏我信燭武遠我壇晉鄙符已吝包胥淚已  
乾堅壁擊賊固吾圍十萬軍民陳濤底陳濤義士有文  
悲寧武悲歌纜一紙潘公一弔快千秋余亦續貂成段  
史嗚呼野史幾人傳張巡雷許差堪擬

弔周總戎遇吉妻劉夫人二首

杜一鳳

韜客何曾練女流閨中鎖鑰壯千秋關弓射敵穿楊手  
厝火全貞化石謀巾幗懦兒輸百着鬚眉俠士遜三籌  
轟轟烈烈劉家姪報國從夫勝栢舟

忻州志

卷六

藝文詩

三

女伴男丁共縮弧箭鋒如雨斃梟俘可憐一陣轅門戟  
畫出周營細柳圖府後積薪籌已定軍前赴火遁尤殊  
他年青史傳雙烈夫報君王妻報夫

七賢祠二首

傅山

身隱文焉用山僧乃勸詩顧瞻七子貌蕭索五城思古  
栢神壇暗秋陰天意悲此中題不得羞殺狀夫爲  
老衲亦知否七人不盡賢鈞衡容逆賊紳笏媿香煙獨  
有雙忠烈餘皆一節傳李公碑贊好名濂有七賢祠碑記斟酌序  
當年

侯節婦詩

楊玉樹



牧河有水深而且清何以似之侯女之貞舟山有雪白而且潔何以似之侯女之節嗚咄哉維雪有消侯女之烈千古爲昭維冰有泮侯女之心千古不變

吳孝子詩

李夢龍

大聖無奇特持身孝最先吳君天性美不愧古人賢泪滴冬生笋思深地湧泉竚看龍鳳詔褒錫正連綿

題五雲祠院中松

史三榮

俗名松樹坡祠內石井一眼水深二三尺在亥殊像下凡拜水白雲洞者於此先取陪水

亭亭直上五雲邊黛色蒼蒼知幾年虬曲半天驚日月

忻州志

卷六 藝文詩

三

龍吟深地撼風烟歲寒不死貞心古石冷常棲玉骨堅說與樵夫休剪伐待畱楨幹好扶天

遊碧雲洞

在繫舟北麓中奉神禱雨多應

史佳

四千里路客來傍碧雲遊徑曲沙畱迹坡高石作樓長烟浮牧馬午日過梨溝獨擔橫如擔誰擔世上愁

四月八月再遊雙乳山

周繼殷

憶昔曾登陟於今續舊遊鳥巢憑上下草色自春秋柳絮乘風舞花香逐水浮檐前一片石剗削待題畱雙乳重來四月天山青水白鳥聲連溪邊馬走盤迴路嶺半人耘高下田甘露如珠盈草際鮮花似錦遍山巔



題成數句鬚將斷未盡登臨竟日緣

登白雲洞

趙家駿

曲徑千盤樹杪分岩峩蒼翠逼氤氲懸崖暗滴仙盤露  
大壑橫翻帝女雲一泓晴嵐連石嶺幾洄浪湧望淖瀆  
迤東更有先賢迹擬過書堂檢舊文

遊陀羅山

周繼殷

聞道陀羅雅致好峯頭萬樹松華老清滴滴出龍涎  
赤石磷磷呈瑪瑙情倦踈林憇柳陰興豪曲澗尋芳草  
何如收拾夢浮生無計掛兮無懊惱

七巖廟

趙家駿

忻州志

卷六

藝文詩

三

誰將金斗斷簫音猶有磨笄恨不禁雲黯林楓天慘淡  
日沉碧洞晝陰森操舟節冷凌霜雪化石心寒重古今  
凜凜七巖懸日月春秋不愧薦馨歆

獨擔山和壁間韻

周繼殷

形勝天開畫不成從來八景舊傳名遙峯斜映千波翠  
遠水環流萬巘清童冠與偕日影暮行歌互答月華明  
人生樂事誠何限剩得餘情寄一銘

彭似楊公輓歌

史貽直

大學士

卓行應稱最如君迥不羣循良齊召杜教授繼河汾邁  
澗窟彌矢丹鉛老益勤佳城今宿草慷慨問遺文



前題

勵宗萬

故老今誰在先生贍典型出爲悃悞吏歸作少微星表  
墓餘雙碣傳家有一經昔年訪文獻使節幾回停

遊龍潭

李之擘

山勢何嶒嶸蒼崖屹兩壁一澗恰中通萬松覆若冪滂  
然見流泉石錢綠欲滴幽鳥靜堪聞閒花香可覓羨爾  
巖棲僧迹與心同寂

福田寺

李之擘

籃輿度廣川南入福田寺亂石臥淺蹊數轉山益邃客  
稀鳥韵幽僧老嵐光翠遺山有舊廬斷碣餘殘記懷古

忻州志

卷六

藝文詩

三

一長吟松風動輕吹

石嶺關道中口拈二絕

李之擘

雨餘爽如秋襲袂嵐光翠蛙聲風去來前溪蘆葉邃  
峻岡瀉飛濤停輿問前路炯然倦眼開夕陽山下樹

石嶺關

李之擘

石嶺關頭石路高車聲軋軋馬蕭蕭關河極目風烟淨  
雨洗晴嵐翠染袍

獨擔山

李之擘

大力乾坤一擔擔區區拳石亦何堪問君擔向何方去  
笑指竹批雙耳尖



雙乳山

李之擘

突如平陸起雙峯一澗中分兩寺鐘更羨嬰兒能飽乳  
秀容萬載慶年豐

虎頭山

李之擘

破壁龍飛羨虎頭畫工墨妙絕千秋此間一有虎頭石  
誰寫掀天萬木颼

牧馬河

李之擘

白馬山東牧馬河當年鐵騎幾經過迄今澤潤千塍列  
水滿長渠隴滿禾

望東南諸山

李之擘

忻州志

卷六

藝文詩

三

九原蜿蜒伏游龍望裏羣峯擬岱宗靈岳一埵連十嶺  
五臺山有四埵石嶺其一也繫舟萬載鎮堯封巖傳隱誦松花老泉

落雲梯礪瀨溶保障迄今遺愛遠烟蘿古洞拜儀容郡南廣峪有洞尹鐸遺像在焉禱雨應封潤國濟民侯

九原

李之擘

北邙蒿里古今悲華表何年返令威獨向九原原上望  
殘雲亂樹弔斜暉

陀羅山

李之擘

獨衝烟雨過陀羅亂石奔濤見古河北有雲中南牧馬  
雙流合抱入滹沱



過公孫杵臼墓

楊弘儒

不覺寒生骨非關秋氣森徘徊隴上義激昂墓中心片  
碣留天地荒邱足古今試看華表上猶作懦夫箴

繫舟環

楊弘儒

黃龍難去覓山頭山石何緣號繫舟想見懷襄憂聖處  
令人長詠太原脩

遊廣峪山黃堂洞

楊克茂

榮迴石磴曲盤蛇倒削洪崖百丈奢翠嶂空中浮玳瑁  
丹樓嶺上擁烟霞勢吞塞北川原小目盡天南風雨斜  
洞裏依稀思保障至今猶庇萬人家

忻州志

卷六

藝文詩

三

登廣峪望繫舟山

楊克茂

西望讀書山欲尋讀書處前途不可登廣峪堆雲霧

牧水

楊克茂

牧河春漲滿遠郭曉冷冷渠引千家利橋橫七里汀鷺  
翻沙映白水潤草浮青幸我臨流近遐心差可銘

程侯山

楊述

仗義亭亭立趙封非徒慷慨就從容當年了却存孤業  
化作西來第一峯

雁邱歌

元遺山先生  
事見廣輿記

張安世

汾河之岸地縱橫半畝荒蕪不敢耕共說雙雁埋此地



卽令卽址隱未平雁卽千載名不滅此因說起堪悽絕  
一雁被繳在民家一雁悲鳴來永訣暮入民家交頸死  
到晚空餘雙義血義聲嘖嘖萬口同尺土封來傳無窮  
荒卽不老魂常在夜聽長淚泣西風憶昔飛鳴共相逐  
誓向黃泉常比目卽上應長明妃草卽草當如拱墓木  
高義何分人與物行人到此都龔蹙可羞曠野纍纍者  
死多異穴生同屋

春遊稻畦灣 在香泉東

李飛龍

入山深處曙光開鶴韻松風隔岸來細柳拂雲分綠水  
巉巖碍日冷蒼苔畦邊種稻知寒盡嶺上騎牛帶雨回

忻州志

卷六

藝文詩

三七

古廟泉聲留鳥語桃花數點照新杯

鳳凰崗

李文舉

突兀高崗號鳳凰翛然獨立向忻鄉一身毛富三春雨  
五色文成九月霜雲佈半腰疑展翼日臨當頂信朝陽  
千年永是邦家瑞誰謂靈禽不至疆

雁字詩十二章

李雲霄

年來幾度去臨池南北迢迢路正岐抹月批風毛穎傳  
奔雷掣電羽林師門空不管人題鳳地僻偏宜鳥問竒  
劒未舞時先脫藁從前草聖有誰知  
碧落文章滿太虛閔披秋色漫躊躇不愁閔沸秦無鹿



只恨殘碑魯是魚影被塵封雲自拭翎爲風捲雨能梳  
朝朝染翰青雲上勝讀牙籤萬部書

逆旅相逢幾丈夫淒風楚雨遍江湖校書天祿誰支俸  
啄稻秋原爾課租不信雙鉤搖玉管還看一畫演河圖  
咸陽火烈坑儒盡燒斷空中片影無

爲挾關山尺素鱗陰晴不斷踏迷津倚嵐饒滴千峯翠  
研露絕無半點塵纔向竹林排个个瞥從天際數人人  
蠶頭燕尾仍皮相獨有摩空最率真

楚鷺家雞不是羣生來腕力帶顏筋江心倒瀉池中水  
嶺首橫披紙上雲鼉碣何堪銘五岳禽經久已印三墳

忻州志

卷六

藝文詩

三

若逢才子窻頭臥刻下烟浮白練裙

待漏清虛夜色闌烏官朝罷紀雲官乾坤掌故隨心草  
山木遊人仰面看銀河橋邊題柱早鐵門檻外寄書難  
嗟予瑣尾流連輩煮字充饑未忍餐

第一難耕是硯田霜毫禿盡幾逢年平鋪素練都飛白  
高曳烏雲任草玄百笏符空看羽化千蕉葉落解枯禪  
竒貧未向長安賣恐賺人閒不義錢

拋來蒼頡歷年多今又重翻鳥跡過每日隨陽探鳳穴  
憑空放爪到龍窩斲冰鏤雪無同調識雨穿雲別有梭  
爲問山陰癡道士等閒輸却一羣鷺



何處梁空說大家笑看粉本亂塗鴉黃雲好醉頭濡墨  
青夢猶香筆放花落照只愁迷鳥篆經秋並不問桑麻  
鐘馭飯後原多事真蹟寧須罩碧紗

塞月關山賦遠征飛傳露布自昆明屯田喜種雲千頃  
戍浦哀鳴漏幾聲細柳搖來烽火急荻灰畫去墨痕輕  
一時草檄干戈定品價應償十五城

巖樾無屋渚無舟四望荒烟水上浮博採風謠歌雅頌  
親嘗寒暑註春秋籀文不辨東西漢羽族能留大小歐  
許氏慙懃搜舊榻六書豈止在雍州

秋光澹巖逸江楓極目烟霞點化工世上騷壇誇繡虎

忻州志

卷六

藝文詩

三

天邊羽客笑雕蟲清裁暗濕霏微露健翮遙回浙瀝風  
千載如何多怪事勞君咄咄學書空

獨擔山

張作舟

高峯何崛起獨力半撐天世上多奇絕誰曾與共肩

讀書山

張作舟

書山翠嶽俯全州爲慕芳踪到上頭屏立金嵐扶北極  
帶環馬水挽東流松聲叶韻宜風雅草色成章射斗牛  
應是地靈人更傑高山仰止日悠悠

三晉雲山皆北向

張安世

奕奕名山拱帝京瞻雲就日不勝情恩深北闕祥光靄



澤滿中條瑞氣榮萬岫來王疑鷺立千巖向花似鶴行  
盛時喬嶽皆靈異好視公侯奉聖明

重遊東巖山有感

張安世

經年旅况始山行不綻芒屨不盡情共把飛觴思舊雨  
重來溫石鬪新晴千林霜棗雲霞色萬壑寒松懸管聲  
却羨蘭亭誰作主永和草木至今榮

弔白面將軍

張安世

血迸征袍馬汗濺阱陁一戰震山川閃旗亂拂寒峯動  
雷鼓驚翻碧浪懸曉日猶含陰雨淚悲風長吼夕陽天  
瞻雲會得將軍意愁望西塵起漢烟



賦

秋望賦

元好問

步裴回而徙倚放吾目乎高明極天宇之空曠閱歲律之  
崢嶸於時積雨收霖景氣肅清秋風蕭條萬籟俱鳴菊  
鮮鮮而散花雁杳杳而遺聲下木葉於庭臯動砧杵於  
蕪城穿林早寒陰崖晝冥濃澹霏拂繞白紆青紛叢薄  
之相依浩霜露之已盈送蒼蒼之落日山川鬱其不平  
瞻彼轅轅西走漢京虎踞龍蟠王伯所憑雲烟慘而動  
色草木起而爲兵望崧少之霞景渺浮丘之獨征汗漫  
之不可與期竟老我而何成挹清風於箕顛高巢由之

忻州志

卷六

藝文賦

三

遺名悟出處之有道非一理之能并繫南山之石田維  
景畧之所耕老螭盤盤空谷淪精非雲雷之一舉將草  
木之偕零太行截天大河東傾邈神州於西北倪風景  
於新亭念世故之方殷心寂寞而潛驚激南聲於寥廓  
慨涕泗之緣纓吁咄哉事變於已窮氣生乎所激豫州  
之土復於慷慨擊節之誓西域之侯起於窮悴傭書之  
筆諒生世之有爲寧白首而坐食且夫飛鳥而戀故鄉  
婺婦而憂公室豈有夷墳墓而剪桑梓視若越肥而秦  
瘠天人不可以偏廢日月不可以坐失然則時之所感  
也非無侯蟲之悲至於整六翮而睨層霄亦庶幾乎蟄



禽之一擊

遊香泉賦

黨承志

滹濱子宦遊而歸乃偕舊友復遊於香泉於是續蘭佩解  
塵纓循往躅尋前盟逶迤水涉窈窕山行望蒼芒之楚  
色聽潺湲之溪聲既造深隱觀幽妍瞻金刹禮青蓮想  
昔眠之蕙帳啜舊飲之蘭泉神怡體暢塵襟以蠲迺躡  
芒屨陟層巔盼睇林壑睨望山川默識舊遊之處俱歷  
乎目前俛而思焉恍兮如昨屈指計之乃倏矣二十一  
年於是相顧愕眙喟然太息蓋觀山川之猶昔警歲月  
之如流信浮生之若夢也既而乃相謂曰異哉吾儕今

忻州志

卷六

藝文賦

三

昔之情也風景不殊交與如故胡昔遊而樂今胡樂而  
嘆也豈不以昔少壯而今老大乎日月逝而功業未究  
乎時代謝而會有極乎夫人鈞幹運萬物遂也人性物  
靈一厥類也消息盈虛皆一氣也立德立言良足貴也  
安時處順稱賢智也神逸氣柔德乃休也時清年豐足  
優遊也居易俟命吾何憂也我思古人獲我求也辭既  
乃渙然各釋克若有得嘯詠嬉遊無異乎疇昔

香泉亭賦

再遊值山僧無礙構亭於泉上乃為賦之

黨承志

悲彼流泉兮山之幽味甘若飴兮玉色浮怪石巉巖兮蹲  
虎豹泓深莫測兮潛蛟虬澤物滋稼兮衍芳潤興雲吐



霧兮資靈湫青松吟風兮響山谷紅葉醉霜兮明素秋  
作亭泉上兮神斯庥亦可樽俎兮來晏游功同智仙兮  
師其以吾於醉翁兮安敢擬茲山佳勝兮今以怡

耕藉賦

以重農貴粟春  
滿寰瀛爲韻

唐際唐

古聖人之首出庶物也磐石萬年苞桑一統南苑遊麟西  
山鳴鳳瑞獻金船祥開銀甕德海四輕道高三重武緯  
文經禮耕義種矇矓誦流火之詩太師占維魚之夢若  
乃令司青鳥駕起蒼龍鶯梭織翠燕剪裁紅梅妝雪艷  
柳鎖烟濃二十四番之風半度一百五日之雨初逢望  
杏花兮鋪錦瞻蒲葉兮銛鋒觀戴勝之應候聆布穀之

忻州志

卷六

藝文賦

三

勸農春爲發生動土膏於禹甸乾元資始臨木正於堯  
封於是頒十行率三事騁六飛呵七萃九鷹分兮不憚  
煩雙龍出兮寧挾貴雉尾雲蒸魚鬚霞蔚象乃供其耦  
耕蛙亦奏其鼓吹花迎劍佩黃鸝與紫燕爭鳴柳拂旌  
旗青草共翠花一視星拱兮千官從雲兮百族爰幸青  
壇乃降黃屋常伯奏璋司農發粟微塵起兮軟紅雜佩  
鏘兮結綠草木于以欣欣山川爲之肅肅援黛耜以三  
推命青鉉於九牧克勤東作無妨滄海遺珠相慶西成  
不羨藍田生玉繇是張胆沃心之士雕題鑿齒之賓掃  
眉椎髻之婦垂髻鮐背之民莫不嵩呼而稽首華祝以



搖唇恭攀豹尾喜識龍鱗遂乃東漸日窟西被河濱北  
窮紫塞南極朱垠樹黃茂於方苞三時鮮不毛之地鳩  
藍樓以于耜萬里同有脚之春驚絕堯灾憂忘周旱兩  
岐之麥何多九穗之禾非罕羨利普於土宜豐亨寧其  
人滿嘉祀事之孔明賴康功之實纘薦皇祖以馨香登  
曾孫之雕纂蕭茅載烈合駢牡其血管黍稷是烝裸黃  
流於玉瓚此尊祖以廣孝治也而敬天勤民之道備其  
間敢作歌曰東風兮送寒東帝兮履端出東郭兮播百  
穀之東郊兮鳴八鑾服先疇兮畝畝知稼穡兮艱難艱  
難兮千耦熙皞兮三登授人時兮萬邦協固國本兮百  
室盈飲蜡吹兮七月執醫養兮五更教申孝悌兮化啟  
文明功臣圖閣兮學士登瀛百禮法周書秉耒先勞於  
赤縣一遊符夏諺稱觥善煩乎蒼生



詞

勸戒百姓清平樂十四調

賈容遠

勸孝弟

親恩無極勸爾根基植溫清晨昏循子職毋使高堂心  
愁 雙親最愛連枝頻吹伯仲堦笈敦乃天倫樂事祥  
和洋溢庭幃

勸和睦

鄉鄰姻戚勸爾和柔輯汝詐我虞招禍適豈是傳家良  
術 有無多寡宜哀吉凶患難同憂谿刻澆漓盡刷街  
衢出入恬休

忻州志

卷六

藝文詞

五

勸禮讓

淑躬維禮勸爾謙冲履無止無儀明訓煒莫類狂狻麤  
鄙 最嫌賢知先人周旋醕答溫文除却淫靡有禁往  
來文質彬彬

勸勤讀

士冠民首勸爾芳年懋雪案鷄窻拖紫綬端的詩書無  
負 陡將閒意消磨寸分陰莫輕過聖賢源頭匪遠怎  
煩師友嚴阿

勸力農

民天維食勸爾耕耘力南畝西疇勤稼穡博得倉箱豐



精 倘思手足安然室人怎免饑寒快趁三時播獲訣  
歌長樂堯天

勸工作

工前民用勸爾精勤供輪扁魯班雖異衆無過慤勤磨  
礱 莫將嬾志纏綿業荒怎熟方圓攻木攻金志食藝  
成好備冬官

勸商賈

爲商何病勸爾公平乘遠服車牛聽汝騁莫使低昂殊  
等 赤童皓叟難欺懋遷斷勿居竒以有易無情也豈  
容過占便宜

忻州志

卷六

藝文詞

巽

戒遊惰

授身何職戒爾耽遊佚貧富榮枯須自惕切莫偷安滋  
慝 男勤耕讀工商女操井臼蠶桑編戶勸勤警惰漸  
消淫逸猖狂

戒爭訟

官情無寵戒爾來爭訟枷鎖桁楊非福種忍使調亭毋  
控 案頭三尺精明肯教兩造橫行胥役往來攪擾情  
乖產蕩身輕

戒抗糧

輸將宜速戒爾煩催促減稅蠲租凶歲獨毋使官差鞭



朴 勉將金粟齊投柴門里胥何求並教黨鄰宗族早  
完征賦優游

戒賭博

守家何道戒爾輕錢鈔唱六呼么空自勞立把田園消  
耗 祖宗累積維艱子孫一擲何安曾見金錢戲耍阿  
誰置地增田

戒包娼

無邊風月戒爾迷花蝶破產隕名復傷體竟使人禽難  
別 猛提廉恥惺惺異花野草勿櫻任彼游絲牽惹要  
知流水無情

忻州志

卷六

藝文詞

四

戒鬪毆

虎爭何益戒爾擎拳敵劉肋沈腰輕毆擊真個身危親  
及 快將暴氣收回只凭誰是誰非莫作一時蚌鷸須  
知歷險如夷

戒輕生

髮膚何自戒爾輕如屣繫頸沉淵毋漫試一霎神魂難  
繼 當思生我勤劬肯輕捨命捐軀除却孝忠節義死  
生仔細躊躇



告示

為勸諭事

竇容邃

照得人性皆善誰甘為惡祇緣氣稟拘於生初物欲蔽於生後遂致習俗相染效尤成風或有善端發見因獎勵不明而輒自遏抑或有惡念乍萌因懲誡未加而遂至橫流此豈人性之本然世風之難化耶亦司牧者誠求之未至訓迪之無方耳本州蒞任以來備悉情事茲條列善行惡行事件以與郡邑所屬民人砥勵而更新焉尚其敬聽之勿忽

善行

忻州志

卷六

藝文告示

四六

一孝順父母富者務須甘旨供養貧者亦要菽水承歡凡事能順適父母之意父母自然喜悅若遇疾病便當親奉湯藥不可假手他人至於喪葬尤宜恪守禮制不可惑於習俗四時八節追念不忘春露秋霜拜掃無缺此為能孝之人孝子孝婦總屬一體有能實力奉行者一經察實定加獎勵

一友愛兄弟一衣不忍先着一飯不忍獨嗜財貨不忍私藏產業不忍爭置有善相與共成有惡相與共隱此為能弟之人有能實力奉行者一經察實定加獎勵

勵



一敦睦九族上而高曾祖考下而子孫曾元中間雖支  
分派別其實皆是一脉所出能於此處看得痛癢相  
關便是仁人孝子之用心遇有貧老無依卽爲收養  
全活者一經察實定加獎勵

一窮民無告莫甚於孤兒寡婦有親屬者着落親屬照  
管無親屬者責之鄰里保護無論親疎有能撫孤不  
至失所恤寡不致改節者一經察實定加獎勵

一風俗之不厚由於禮義之不明禮義之不明由於教  
學之不正欲教學之得其正必自蒙養始蒙養之道  
備載小學一書各地師生有能恪遵小學遺法教訓

童蒙者一經察實定加獎勵

一遷善改過自脩之善行勸善規過里鄰之厚德見人  
有善不能獨成委曲以玉成之見人有過不能遽止  
婉言以勸止之此等心地便無愧於聖賢有能實力  
奉行者一經察實定加獎勵

一同鄉共里非親則友遇有疾病羣相扶持遇有婚喪  
共相助理如此行之日久自成雍睦之俗有能實力  
奉行爲鄉黨依賴者一經察實定加獎勵

一患難切身最爲可憐死生關頭尤所當憫有能遇窮  
途而力爲拯救心垂死而克保生命者一經察實定



加獎勵

一豐裕之家每多刻苦不知廣種陰德與其有餘粟而坐視紅腐何若輕息出借以濟貧人與其有餘金而違禁剝削何若薄利通融以資鄉黨使閭里均沾惠澤有能實力奉行者一經察實定加獎勵

一施捨棺木使無力之貧民不至屍骸暴露捐置義塚使異鄉之孤魂永安幽泉此等厚德非同尋常有能實力奉行者一經察實定加獎勵

一境內橋梁道路傍樹株除舊有者仍照例脩葺培植外有能將已塌之橋梁已壞之道路脩葺堅固平

坦已槁之樹株補植成陰者一經察實定加獎勵

一財物原有定數貪取必致後悔如偶拾他人遺失財物當時給還本主者一經察實定加獎勵

一兩造構訟必有曲直曲者受辱直者拖累有能觀論排解保全身家免滋後悔及處人兄弟叔姪間能使之消釋和睦者一經察實定加獎勵

一崇尚節儉計一年之所入除日用經費外有婚喪大事止可量力而行不可浪費飾觀總要每年積下些穀石以備凶荒多者數百石少者數十石隨田地之多寡以爲儲蓄縱遇歉收亦不至凍餒流離有能實



力奉行者一經察實定加獎勵

以上善行十四條凡我子民皆宜實力奉行一經舉報詳加察核大者給匾懸門小者登名紀善簿非犯大惡不除其名各宜勸勉共成善類特諭

惡行

一子婦忤逆不聽父母教訓動輒言語冲撞或自圖飽煖不顧父母凍餒及遭喪不葬屍骸暴露者是爲不孝之惡一經察實定行嚴究

一卑幼侮慢尊長兄弟互結冤仇或因口角致爭或因田土起釁致傷天性至愛不顧禮義大鬧是爲不弟

忻州志

卷六

藝文告示

三

之惡一經察實定行嚴究

一假造庚書賴人婚姻嫌婿貧窮圖財改聘伯叔兄弟欺壓寡婦逼嫁凌虐孤兒奪產改造文約佔人田房違禁取利折人地土甚至夥証夥告朋謀騙佔家財此爲不義之惡一經察實定行嚴究

一主謀教唆使人骨肉離散興滅詞訟使人鄰里參商此爲傷風敗俗之惡一經察實定行嚴究

一同甲共牌之人遇貧窮疾病不爲扶持反乘危欺壓遇婚嫁喪葬不爲幫助反借端局騙此爲忍心害理之惡一經察實定行嚴究



一慣用機械霸佔人家田產盜葬人家墳墓爭奪人家渠水打毀人家田禾砍伐人家樹木此爲恃強凌弱之惡一經察實定行嚴究

一損壞道路橋梁道傍樹株踐踏已成禾苗撒放牲畜不爲攔圈招畱無賴以作佃戶此爲損人利己之惡一經察實定行嚴究

一窩賭包娼必係遊手好閑之徒酗酒鬪毆盡屬逞兇亡命之輩此風不絕甚爲地方之累該地鄉保不時稽查密稟以憑嚴拏如敢扶徇定行併究

一異端邪教招徒引衆形踪詭秘最易煽惑人心無知鄉愚徃徃墮彼術中卽如酬神還愿何至披枷拖鎖傷及體膚似此等類俱爲附和邪術法所不宥除改邪歸正外倘有故習未盡復蹈前轍者一經察實定行拏究

一私開礦廠久奉嚴禁倘有不法之徒恃在深山密地無人知覺誘引愚人開採射利滋擾地方一經察實定加嚴究該鄉保甲鄰通同容隱者連坐

一凡民人及應捕人役誣執平人做賊詐騙財物公差下鄉打詐需索者該鄉保甲鄰卽指事連名稟報以便拏究若畏懼不報者一體治罪



一物價有千般斗秤無兩樣以後民間秤只用十六兩  
斗只照官定法式物貴物賤只在價上消長不許使  
假贖人如有敢於私行大小輕重任意增減者一經  
察出定行嚴究

一造言生事弄巧行奸之敗類慣貼匿名傳單發人陰  
私歌謠顛倒是非搖亂官政此等壞心奸民罪不容  
誅除密行訪拏嚴究外該鄉保甲鄰細加察查如有  
確証實據者開揭送官盡法重處

一凡懷挾私忿將不干已事告官控訴希圖報復及告  
已事而組織平日短行或糾集無賴連名具控者定  
係刁健不法之徒察出定行重究

以上惡行十四條凡我子民皆宜實力屏絕一經  
發覺再加察核重者按律嚴究輕者註名紀惡簿  
非有大善不除其名各宜警惕免蹈惡蹟特諭

### 禁止還愿陋俗

爲嚴禁陋俗以端風化事照得爲善錫福作惡降殃此  
千古不易之理惟在誠心致敬反躬脩省方可挽回並  
非以毀形破膚諂媚神明而卽能獲福者近訪聞得有  
酬神還愿一事出乎常情之外甚爲詫異如每歲三月  
二十八日本城泰山廟及西北鄉岱嶽殿五月初五日



城隍廟五月十三日關帝廟多有因父母疾病許愿酬神或男女頂帶行枷手足繫鐐鑊者或有袒背掛鈎拖帶鉄索傷及皮膚者更有婦女拜道亦如男子者殊不知身體髮膚受之父母不可毀傷如此行徑已違聖教而且縱令妻女赴廟燒香更覺褻瀆神明實爲有傷風化查律載若有官及軍民之家縱令妻女於寺觀神廟燒香者笞四十罪坐夫男無夫男者罪坐本婦其寺觀神廟住持及守門之人不爲禁止者與同罪等因遵奉在案今忻屬既有此等陋俗自應禁革查拏但積習已久合亟先行出示曉諭爲此示仰州屬一應人等知悉

忻州志

卷六

藝文告示

番

嗣後如有因病許愿者止許虔備香楮誠心叩謝永不許男女拖繩拜道負枷帶扭倘敢故違除將該犯及婦女夫男重處外定將該廟住持及守門之人一併按律治罪决不寬貸各宜凜遵毋違



雜志

州城白鶴觀為唐元元皇帝祠每年二月望道書云是元元誕日有鶴降此多至十數少不下二三州人皆先期延望刺史約先見者有朋樽之賜鶴既至翔舞階除了不驚畏金元之交兵荒亂離鶴不復至矣元好問天慶觀記言之甚詳至明萬曆間巡撫魏允貞議包城磚甬畢而鶴復至約有百餘次第翔集移時而去時同僚皆賦詩記異詩載志中

水馬村玉清觀有牡丹甚茂明弘治間王府析移其枝遂稿後有村民由省會歸者途遇女子求載車中及觀下

忻州志

卷六

雜志

五

車入叩之則烏有也既而花復盛開人謂為花神云

此按

觀遭流寇亂焚於火其花僅存二枝高尺許康熙二十八年道人楊正梅募化重建花忽大發密茂如初

亦若有神助也

繫舟山東南有白雲洞俗名乾石窰有文殊像鄉民遇旱詣禱置盞像前巖水滴盞中即得雨雨大小視水多寡土人信之明楊維嶽云余兩禱皆應

州西北金山有石綠洞深不可測昔有持炬入者及半聞流水聲隔水有石門懼不敢進後有礦徒聚竊者覓得前洞欲入風從下起不可燭遂不能下

北趙村龍首峯前有水池相傳鄉人濬池即有微雨



南宋村玉泉山北相傳昔有馬食禾逐之不見掘之得水  
溢與地平遂名馬井

州北白村里絕險可避兵明正統十四年虜圍寨其夜村  
中武安王廟刀鳴民家金鉄皆有聲衆懼不祥次日寇  
解去云夜見寨上有火光及聞人馬聲疑有備也

州譙鐘數百年物也明弘治間鐘夫他往其妻臥蓐未久  
代擊之遂裂有聲南去過牧馬河而寂州主王軒遣人  
至河南向祭禱覺有聲自南來者裂處漸合

南宋村民胡璋鋤地倦臥夢神遣雨雹於東鄉璋盡拔溝  
草覆之覺語同輩衆往視冰雹滿溝草覆焉因名其臥

忻州志

卷六

雜志

五

處曰胡璋崖明楊維嶽云考崖在城之與隅不在南宋  
亦無溝疑有誤

州牧劉景文與晉文公偶語又死而復甦作詩而逝詳見  
名宦

明萬曆癸巳年北郊紫花池有觀若城郭者樓櫓畢具次  
年議甃城衆謂先兆云

州西門外唐李克用墓金時盜掘之州守夢王告云墓中  
有酒盜飲之唇皆黑可以此爲驗明日如其言捕捉所

獲盜唇果黑寺僧居其半

見廣輿記

按晉三李李克用墓在代輿記偶誤今姑存之

天啟五年知州李如鴻蒞廳事忽一鶴翔舞而下李異之



扁軒曰來鶴今存署

崇禎十七年定安王府畜騾一頭一日僕喂豆騾搖頭不食僕怒罵之騾作人言曰我不久死汝亦難得生矣閱月餘闖寇至騾與僕俱死

國朝

康熙十二年十月州牧柯署中忽有磚瓦從空而下各約重二十餘斤日夜不息吏目署內亦如之歷三月餘始息十九年州牧許任時亦經一次旋即帖然均無他恙康熙十五年正月州牧柯入省賀新節歸署天向晚進至三堂忽見兩人相爭如戢鬪狀柯大驚呼人持劍摩之

忻州志

卷六

雜志

七

飛奔樑上次早驗看上釘木板下藏紙人一對俱鈴印信立毀之不復侵擾

木芝村王作良者業農舉一子有股疾不能行已數歲人皆以爲棄物一日父命守葡萄葡萄詣架底兀坐忽有二騎馬者至于殷勤使架柱繼其馬一人曰子胡不能動履子告以故一人曰吾視之向兩股手摩數四疾愈非曩狀子喜曰叟今生我願求姓氏以感沒齒一人曰我兩人一達王一醫王此子急歸家步履矯捷如飛父母異之子具以告急出視之烏有矣其子竟成偉男子且善走



忻州志後序

郡之有志所以載疆域山川紀法制典則表風土人物昭人文而垂治蹟也顧疆土古今未改而人物代謝迭更雖志之者紀善不紀惡而爲所志者有盛亦有衰隆替遞乘布諸簡策昭茲來許維風勵俗所關詎淺鮮哉知非持大公至正之心操勵世磨鈍之具秉班馬巨筆而喻春秋微旨者未易脩飭而釐定之也忻郡當太原北衝屬

神京右臂夙號名區勤儉質朴陶唐之遺風未泯作興鼓舞

忻州志

卷六 後序

五

盛朝之德化維新順

列聖熙雍邛隆之治者百有餘年其間人物風景文章政績燦然可紀而志典獨闕闇然弗章雖太原通志已採其畧而本郡實錄未覩其詳前任諸名公咸有心纂輯未遑振舉不無遺憾乾隆丙寅歲我

竇公恭膺

簡命來牧茲土整躬飭物訓俗型方刑名本諸仁厚經術制爲法程罔弗以表正風俗爲急務因廣蒐文獻博採羣言按舊冊立新條敘述詳明銓次臚列每條各綴文詞簡要精核煥然成書書成而公之精誠與



書共垂不朽矣方 公之成是書也值丁卯夏五月  
旱魃爲災山川滌滌農民懸耒而嘆

竇公恐懼脩省步禱三日竭精萃神發牒城隍字字從  
心血流出若覩倒懸之在目片刻不敢即安者真誠  
感格上達

穹蒼甘霖立沛咸曰竇公時雨嗟嗟 公之誠信發之於  
牒足以格

蒼冥曾謂筆之於志不足以詔後世也哉應將原發牒文  
並入志內以示後來共傳永久 兩儀 躬逢盛美共沐

休明敢布俚言以敘始末詎不自揣固陋實愚忱之  
忻州志 後序 五

感發於不能自已焉耳

乾隆十二年六月朔

賜同進士出身文林郎原任平陽府儒學教授陳兩儀謹  
敘



忻州志後序

自古王者建國必設史官史官掌書記以紀一代政事之得失人品之邪正風俗之盛衰殆將以垂法戒昭勸懲也下至一郡一邑亦各有誌大小雖殊而其爲用則一我州之誌由來尚矣奈自明季楊公纂脩而後久無以爲事者迄今百有餘年人文湮沒不勝屈指論者遂多殘缺廢墜之憂前任周公力爲圖之究未告竣後視篆李公頗加檢校亦未刊行乾隆十年

竇公下車州人欽其理學合詞敦請公慨然以編輯爲

忻州志

卷六 後序

卒

已任爰取明時楊公斷簡與當代周李二公草錄參互考訂斟酌通變刪其繁文存其體要僞者去之賢者登之遺者補之竭半載之憂勤而州誌詳明卽捐俸募貲壽諸梨棗余捧讀之辭不泛設義無不彰史魚董狐之筆大書特書之義誠足以炳蔚霄壤也信於今而傳於後謂非公之善政歟按公之善政猶不止此公秉性剛方清介自持蒞任以來苞苴盡絕請託不行而且作興學校頒布孝經望杏瞻蒲勸民力出輕徭薄賦野無追呼禁賭彌盜游手安業更有異者時旱其乾州人議禱俱沿惡習公獨吐棄一切敬



製牒文慷慨論列少無腴詞跪拜之下一爲宣讀而甘霖遂至三日之內四野霑足或以爲公有先覺之明而不知實公之正氣與公之至誠所感也猶有可紀者俗傳忻城名爲卧牛城特建鐘樓以作牛心自牛心壞而雨場不時矣公惻然動念率衆捐脩崛起臺榭神靈之至不日落成從此風調雨順嘉禾遍野豐亨有兆倉箱盈止一郡之人舉欣欣然有喜色而相告曰此皆我

實父母之功德也舍此其誰與歸凡有血氣者聞其鐘之聲莫不鼓掌稱快余亦心寫其事因敘公之志而

忻州志

卷六

後序

空

並及之然則公之政聲其殆與鐘聲四達矣乎行見銘功太常與日月爭光夫何鐫誌方成而公竟以乞休闡州民攀轅卧轍呼籲上官而上官賢明竟肯爲我忻民曲留也公之聲價於是乎益高然則公之學之政之品與公所著之誌均堪歷久彌新也哉是爲

序

峕

乾隆十二年八月中秋日

賜進士出身候選知縣治年家弟張作舟拜題

